

Na osnovu člana 159. tačka 3) Zakona o zaštiti od požara i vatrogastvu ("Službene novine Federacije BiH", broj 64/09), direktor Federalne uprave civilne zaštite donosi

## **PRAVILNIK**

### **O UVJETIMA KOJE MORAJU ISPUNJAVATI OBJEKTI ZA SMJEŠTAJ PROFESIONALNIH I DOBROVOLJNIH VATROGASNIH JEDINICA I VATROGASNIH JEDINICA PRAVNIH LICA I MINIMUM MATERIJALNO - TEHNIČKIH SREDSTAVA POTREBNIH ZA ODRŽAVANJE OPREME I SREDSTAVA TIH JEDINICA I - OSNOVNE ODREDBE**

#### **Član 1.**

Ovim pravilnikom propisuju se uvjeti koje moraju ispunjavati objekti za smještaj profesionalnih i dobrovoljnih vatrogasnih jedinica i vatrogasnih jedinica pravnih lica i minimum materijalno - tehničkih sredstava potrebnih za održavanje opreme i sredstava tih jedinica.

### **II - UVJETI ZA OBJEKTE ZA SMJEŠTAJ VATROGASNIH JEDINICA**

#### **Član 2.**

Profesionalne i dobrovoljne vatrogasne jedinice i vatrogasne jedinice pravnih lica (u daljnjem tekstu: vatrogasne jedinice), u pravilu trebaju imati zasebne objekte - vatrogasne domove ili vatrogasna spremišta (u daljnjem tekstu: vatrogasni objekti), za smještaj vatrogasnih vozila, opreme, uređaja i sredstava i boravak pripadnika vatrogasnih jedinica za vrijeme obavljanja poslova iz nadležnosti vatrogasne jedinice.

#### **Član 3.**

Vatrogasni objekat treba da obezbijedi:

- a) normalan rad i funkcionisanje vatrogasne jedinice,
- b) najoptimalnije vrijeme za vatrogasnu intervenciju, na način da budu locirani u zoni odgovornosti vatrogasne jedinice,
- c) da vatrogasna vozila iz garažnog prostora mogu direktno i slobodno pristupiti saobraćajnici,
- d) nesmetano manevrisanje vatrogasnih vozila u krugu vatrogasnog objekta.

#### **Član 4.**

Vatrogasni objekat treba da sadrži prostorije sljedeće namjene:

- a) garažu za vatrogasna i tehnička vozila,
- b) magacin za smještaj opreme, uređaja i sredstava za gašenje požara, rezervne djelove i slično,
- c) prostoriju za smještaj i odmor pripadnika vatrogasne jedinice,
- d) osmatračko mjesto,
- e) radionice,
- f) učionicu - prostoriju za održavanje stručnih obuka i održavanje sastanaka,
- g) kancelarijski prostor.

#### **Član 5.**

Za upotrebu i čuvanje vatrogasnog objekta, starješina vatrogasne jedinice donosi kućni red koji postavlja na zid na vidljivom mjestu u objektu.

Pripadnici vatrogasne jedinice i drugi korisnici vatrogasnog objekta, dužni su pridržavati se kućnog reda iz stava 1. ovog člana.

Sve prostorije i prostori u vatrogasnom objektu trebaju prostorno, kvalitetno i higijenski odgovarati namjeni i u njima se mora održavati red i čistoća.

Ulazak i zadržavanje u prostorijama vatrogasnog objekta dozvoljen je samo pripadnicima vatrogasne jedinice.

Izuzetno, starješina vatrogasne jedinice može privremeno dozvoliti ulazak i drugima licima u vatrogasni objekat, ako su oni uvedeni od strane pripadnika vatrogasne jedinice ili ukoliko se u objektu održavaju sastanci, nastava, predavanja ili druge aktivnosti u organizaciji vatrogasne jedinice.

#### **Član 6.**

Za čuvanje i održavanje vatrogasnog objekta, odgovorni su starješina vatrogasne jedinice i svi pripadnici vatrogasne jedinice, a posebno lica koja su zadužena za neposredno obavljanje poslova nadzora, čuvanja i održavanja vatrogasnog objekta.

#### **Član 7.**

Vozila, oprema, uređaji i sredstva u vatrogasnim objektima sa kojim raspolaže vatrogasna jedinica, moraju se čuvati od neovlaštene upotrebe, oštećenja, uništenja ili otuđenja i radi toga je neophodan stalni nadzor (dežurstvo) u vatrogasnom objektu.

#### **Član 8.**

Upotreba i održavanje vatrogasnih vozila (sa opremom, uređajima i sredstvima na vozilu), zajedničke zaštitne opreme, kao i druge opreme, uređaja i sredstava koja je smještena u vatrogasnim objektima, obavlja se na način utvrđen Pravilnikom o sadržaju i načinu vođenja evidencija u vatrogasnim jedinicama ("Službene novine Federacije BiH", broj 55/11).

Vatrogasna vozila, oprema, uređaji i sredstva iz stava 1. ovog člana, moraju biti u ispravnom stanju i mogu se koristiti samo u svrhu za koju su namijenjeni.

#### **Član 9.**

Vatrogasni objekti u kojima nije obezbijeden stalni nadzor (dežurstvo), trebaju biti stalno zaključani.

Ključeve od vatrogasnog objekta za slučaj iz stava 1. ovog člana, trebaju imati lica koje odredi starješina vatrogasne jedinice za potrebe hitnih intervencija.

Starješina vatrogasne jedinice određuje lica (dežurni vatrogasac ili drugo lice), koje će imati obavezu čuvanja rezervnih ključeva od vatrogasnog objekta.

#### **Član 10.**

Garaža u vatrogasnom objektu, mora ispunjavati sljedeće uslove:

- a) vrata garaže moraju se otvarati prema vani i pored automatskog otvaranja moraju imati i obavezno i mehaničko (ručno) otvaranje,
- b) garaža mora imati obezbijeden sistem grijanja, pri čemu temperatura u garaži, zimi, mora biti minimalno 7°C,
- c) ako se u garaži ne može postići temperatura od minimalno 7°C, vatrogasna vozila sa vodom moraju imati ugrađene električne grijače za zagrijavanje vode,
- d) garaža mora imati ispravljač i priključak za punjenje akumulatora - baterija na vozilima, nominalnog napona 12 V i 24 V,
- e) garaža mora imati kompresor zraka za punjenje zračnih rezervoara na vozilima.

Korisna površina garaže mora odgovarati uvjetima za smještaj vatrogasnih i drugih vozila, a prostor ispred garaža mora biti stalno slobodan (prohodan).

#### **Član 11.**

U vatrogasnim objektima, naročito garažama i magacinima, mora vladati red koji omogućava dobru preglednost vatrogasnih

vozila, opreme, uređaja i sredstva za gašenje požara, te nesmetan i brz izlazak vatrogasaca i vatrogasnih vozila u slučaju intervencije.

#### Član 12.

Na vatrogasnom objektu sa vanjske strane, pored ulaznih vrata i na vidnom mjestu, postavlja se natpis koji treba da sadrži:

- grb (BiH, Federacije BiH, kantona, općine/grada),
- Bosna i Hercegovina,
- Federacija Bosne i Hercegovine,
- naziv kantona,
- naziv općine/grada,
- naziv vatrogasne jedinice.

#### Član 13.

Pored izvora stalnog napajanja električnom energijom, vatrogasni objekat mora imati i neovisan rezervni izvor napajanja električnom energijom (agregat odgovarajućeg kapaciteta).

#### Član 14.

Vatrogasni objekat mora imati:

- a) obezbijedenu komunikacionu infrastrukturu prema javnom telekom operateru u svrhu ostvarivanja telefonskog, fax, GSM i internet priključka,
- b) predviđeno odgovarajuće mjesto za postavljanje antenskih sistema za sve planirane radio - uređaje.

Za prijem TV i radijskih signala vatrogasni objekat može imati i priključak na TV kablovskog operatera.

#### Član 15.

Vatrogasni objekat za potrebe izvođenja intervencija na gašenju požara mora imati izvedenu vanjsku i unutrašnju hidrantsku mrežu, koja raspolaže dovoljnom količinom vode i potrebnim dinamičkim pritiskom od 4 do 6 bara.

Raspored hidranata treba biti takav da obezbijedi snabdijevanje vodom vatrogasnih vozila:

- a) u garaži vatrogasnog objekta,
- b) u krugu vatrogasnog objekta.

#### Član 16.

Vatrogasni objekat, pored hidrantske mreže iz člana 15. ovog pravilnika, mora imati odgovarajuće rezervoare za vodu, čiji kapacitet omogućava dva uzastopna punjenja vatrogasnog vozila.

Rezervoari za vodu iz stava 1. ovog člana moraju biti postavljeni tako da ne ometaju saobraćaj na površini za kretanje.

Pretakanje vode iz rezervoara u vatrogasno vozilo mora se obezbijediti preko odgovarajuće pumpe ili vatrogasno vozilo mora imati ugrađene pumpe za pretakanje vode.

Kapacitet pumpi za punjenje vatrogasnog vozila mora biti takav da obezbjeđuje brzo punjenje, odnosno održavanje odgovarajućeg kontinuiteta za nabacivanje sredstva za gašenje i ne može biti niži od 3000 litara/minut.

#### Član 17.

Vatrogasni objekat u svom sastavu, pored sadržaja koji su navedeni u članu 4. Pravilnika, mora imati uređen i poligon za obuku, uvježbavanje i kondicioniranje vatrogasaca.

Poligon za obuku iz stava 1. ovog člana, mora biti uređen za izvođenje vježbi gašenja požara i spašavanja i treba minimalno biti opremljen sa jednim ili više bazena ili prikladnim posudama za paljenje goriva radi vježbanja u gašenju požara ili drugim odgovarajućim objektima za simulaciju gašenja požara, kao i drugim objektima i spravama.

#### Član 18.

Vatrogasni objekat mora imati u svom sastavu odgovarajući broj radionica iz člana 4. tačka e) ovog pravilnika, koje su opremljene kompletima alata za rad i sitne opravke, kao i drugom opremom i sredstvima potrebnim za održavanje i popravku vozila, vatrogasne opreme, uređaja i sredstava.

Ako vatrogasni objekat u svom sastavu ima i radionicu za pregled, održavanje i servisiranje aparata za gašenje početnog

požara, u tom slučaju, treba biti opremljena odgovarajućom opremom potrebnom za održavanje aparata, kao i ispuniti druge potrebne uslove propisane Pravilnikom o izboru i održavanju aparata za gašenje početnog požara koji se mogu stavljati u promet sa garantnim rokom i rokom servisiranja ("Službene novine Federacije BiH", broj 46/11).

### III - ZAVRŠNE ODREDBE

#### Član 19.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-02/5-618/12  
30. novembra 2012. godine  
Sarajevo

Direktor  
**Alija Tihć**, s. r.